

# Ti xroon chr'éhen Pablo ti sin Colosenses

**Pablo nixjehe ti sin  
ninko Colosas**

**1** <sup>1</sup>Janhan, Pablo, tsíkjéyána Jesucristo t'ahá ch'an ixra kixin xikaha tjinkaon Díos, la ko kichóni, Timoteo <sup>2</sup>mé ikjian ti xroon i kixin chrók'uayéhéra jahara kichóni tinkáchónki Cristo, tjejora chjasin Colosas, tsík'ónara chojni titekáonra Díos. It'éni Díos la ko Ìnchéni Jesucristo sintañaora la ko tsotjáhara kjuaxróxin.

**Pablo nixjehe Díos kixin kaín  
ti sin tinkáchónki Ìnchéni**

<sup>3</sup>Nkochrín nixjeheni Díos, It'é Ìnchéni Jesucristo, kixin ti jahara, la ko chjéheni Díos kjuasàya <sup>4</sup>kixin ó kuíhini kixin jína tinkachónkíra Ìnchéni Jesucristo la ko tjuéhéra kaín ti sin tinkáchónki Díos. <sup>5</sup>Mé xikaha tjejochohénra kixin ts'ayéhéra ti nkehe chónthe Díos itjen nkaya nkajní. Jahara la xikaha tjejochohénra kixin kuihínra ti itan chaxín kuèté

Díos tsaáxini. <sup>6</sup>Ti itan kuihínra la mé tjejótihiin chojni kuèté chjasintajni la ó tinkák'ánkí ti itan la t'ikonra ti kjuachaxin tjajon Díos. Mé xikaha kóhen ti ó kuihínra la ko kuitekáonra kixin chaxín tjuahára Díos. <sup>7</sup>\*Tíhi mé kjuakohara kichóni Epafra. Jehe ch'an la nkokoa kjuích'ekoni ixra, ndá ijie tjetjinkítsa ch'an ti jahara la jína ich'e ch'an ti ixra kuèté Cristo. <sup>8</sup>Jehe ch'an mé ikui ch'an ntihi la chrónka ch'an kixin nkexrín tjuéhéra kichuara kixin Nchakuén Díos tjetjinkítsa ti jahara.

<sup>9</sup>Méxra ndesi ti ñao kuíhini nkexrín tjejora, la títoehyani tjancheheni Díos kixin tsjinkítsa ti jahara kixin tsonohara jína nkexrín tóxríhin ch'an la ko tsiénxinra kaín kjuaxrexinkaon jína kuèté Nchakuén Díos. <sup>10</sup>Ndá xikaha jína chrókjuákoxinra la chrók'uejora éxi tóxríhin Ìnchéni la chrókjuích'era ixra jína kuèté ch'an la ko antsí chrókónohara nkexrín itjen Díos. <sup>11</sup>Tjanchiani

kixin Díos chrókjuinkĩtsa ti jahara kixin ti kjuachaxin ijíe kuènté ch'an kixin chrókjuachara jína chrók'uejora la ko chrókócháhara kjónté chrókui ichrén kjuaxróxinña. <sup>12</sup>Méxra chrókócháhara la chróchjehéra kjuasáya It'éni Díos kixin kjuajon ch'an kjuachaxin kixin ts'áyéheni ti nkehe náxrjón itjen ti t'etóan ch'an ti t'inkaséña, ti nkehe ts'áyéhe kaín ti sin tinkáchónki Díos. <sup>13</sup>Díos mé kuakitsjekjanxíni ti sítie la kjuajon ch'an kjuachaxin ts'ejóni ti t'etóan ti Xjeen ch'an, imá tjehe ch'an. <sup>14</sup>\*Ti Xjeen ch'an mé k'uenyákohen ti jeheni la kjuínchekaá ti jeheni, ti ijnié ch'an mé kótjuáxin ti ijíeni.

#### Cristo k'uenyákohen ti jeheni

<sup>15</sup>Cristo, ti Xjeen Díos mé kjuakoxin nkexrín itjen ti It'é ch'an, ti nkexro xitjahya t'ikoni, la ko Cristo mé ó xráxín itjen ch'an ti naxa k'onahña chjasintajni.

<sup>16</sup>Kjuachaxíen Díos la kjuích'énaxín ch'an kaín ti nkehe síin nkajní la ko chjasintajni, la ko kaín ti nkehe naxa t'ikonhñani la ko ti nkehe ó t'ikoni. Kjaxin kaín ti nkexro t'etóan la kaín nkehe chóna kjuachaxin la ko kaín kjuachaxin síin nkaya nkajní mé kaín tíha kjuích'éna Cristo la kaín tíha kuènté ch'an. <sup>17</sup>Cristo la ó

xráxín itjen, kjónté naxa kohya ninkehó, la jehe ch'an t'ayakohen ch'an kaín ti nkehe síin kixin chóna ch'an kaín kjuachaxin. <sup>18</sup>\*Cristo mé ti ikja ti cuerpo, mé tíha la ti nínko. Jehe ch'an mé saoxín xechón ch'an kixin antsí tsochóna ch'an kjuachaxin ts'etuehen ch'an kaín nkehe. <sup>19</sup>Mé xíkaha Díos la kóxríhñin kixin ti Xjeen ch'an tsochóna kaín kjuachaxin. <sup>20</sup>\*Kjaxin tjinkaon Díos kixin kjuachaxíen Cristo chrók'uixin kjuaxróxin nkuíxín, nkaya nkajní la ko chjasintajni. Mé kjuasin Cristo kjuaxróxin kixin kjuák'enkáni ch'an ntacruz, ik'uén ch'an.

<sup>21</sup>Jahara la ti ósé k'uéchonhñara Díos, la k'uéinkákohénra ch'an kixin ti nkehe jínahña k'uékjenkayáxin asánra. Andá ijie la, kjuasáye Díos, kjuajon kjuachaxin kixin kjuaxróxin tjejokoara ch'an kixin tinkachónkira ch'an. <sup>22</sup>Kixin Cristo mé k'uényákahanra, kjuasóte ti cuerpoé ch'an. Mé xíkaha kóhen kixin Cristo tsjajon ti jahara ts'áyéhe Díos kixin tsíkjinchetjóá ch'an ti jahara la í chróchontahyara ninkehó ijie. <sup>23</sup>Mé xíkaha chrókuítóéhyara chrókuinkachónkira Ìnchéni. Chrok'uejora éxi ijnko inta nínka tsíkji nuéé, la ko chrókuítóéhyara ti nkehe jína t'ejochohénra. Tíhi mé chronka ti itan tsaáxin kuihínra, la ko ti

itan i mé chrókuihin kaín chojni kuenté chjasintajni, la janhan Pablo kjaxin xrjankaxián ti itan i.

**Pablo ich'e ixra kuèté ninko**

<sup>24</sup>Andá ijie, kjónté tjasótexíni kixin ti jahara, la chéheni kixin xikaha tsjintaxín tjasótia janhan kixin naxa t'itjáña chrókjuasóte Cristo, mé kjuasóteyákoheh ti ninko mé ti cuerpoé ch'an. <sup>25</sup>Mé xikaha Díos kjueyána kixin sít'a ixra kuèté ninko, kixin jína chrók'uejora kixin xrjankaxián ti itan jína kuèté Díos. <sup>26</sup>Ti itan i la ósé ninkexró k'uénoehña, andá ijie kjuínchenohe Díos kaín ti sin tinkáchónki ti jehe ch'an. <sup>27</sup>Díos mé tjinkaon sinchenohe kaín chojni ti nkehe tjete k'uénoehña sin senó, kixin Cristo mé tjejokoara la tjajon ch'an kjuachaxin ts'ejochonhénra ts'ayéhéra ti kjuachaxin ijie kuèté ch'an.

<sup>28</sup>Jeheni mé chrónkaxíni nkehe kuèté Cristo, la nchexraxinkaoni kaín chojni la ko tjakoxíni kaín kjuaxrexinkaon kixin chrókienxín sin jína. Ndá xikaha nkojnko chojni chrók'uánkí ti kjuaxrexinkaon kuèté sin kixin ndoa chrók'uejó sin kixin ts'ejóko sin Cristo. <sup>29</sup>Mé xikaha janhan it'a ti ixra kixin kaín ti kjuachaxin kjuajon Cristo.

**2** <sup>1</sup>Tjínkaon chrókónohara kixin nchónhña ixra kjuít'a kixin chrókjuinkítsa ti jahara la ko kjaxin ti sin tjejó

chjasin Laodicea la ko kaín ti iso sin naxa t'ikönhña ti janhan. <sup>2</sup>Tjínkaon kixin jehe sin chrókóchéhe asén sin la ko nkoqo chrókjuénkayáxin sin, chrójtjuehé sin kícho sin. Mé xikaha chrók'uánkí ti kjuaxrexinkaon kuèté sin la ko chrókienxín sin jína kixin chrókónohe sin ti nkehe ninkexró k'uénoehña kuèté It'éni Díos, mé Cristo tíha.

<sup>3</sup>Cristo mé tjakoxin kaín ti nkehe tjete síma, tíha mé kaín ti kjuaxrexinkaon jína la ko kaín nkehe nohe Díos.

<sup>4</sup>Kaín tíha xrjankaxián kixin ninkexró chrókjuít'ayahyara kixin ti náxrjón nixja sin ó.

<sup>5</sup>Kjónté tjénhña ti tjejora, la ti nchakuená la itjen ntiha kixin xráxinkaon ti jahara, la chéhe asená kixin jína tjejora, naxa tinkachónkira Cristo.

<sup>6</sup>Mé xikaha éxi kuitekáonra Inchéni Jesucristo, la xikaha chrók'uejokoara ch'an. <sup>7</sup>Éxi ijnko inta ninka tsíkji nuéé xikaha chrók'uejora, chrókjuinkíhyara ti nkehe kuihínra, mé xikaha chrókuinkachónkira Jesucristo éxi xráqohara, la ko chróchjehéra Díos kjuasáya nkochríxin.

**Cristo mé ti ntja nixin**

<sup>8</sup>Méxra chrókuítóéhyara kixin ninkexró chrókjuít'ayahara kixin ti nkehe nduáhya chrókjuako sin. Náhi. Ti sin a la tjako ti nkehe tjenkayáxin chojni chjasintajni

ó, andá tjakohya sin ti nkehe tjinkaon Cristo.

<sup>9</sup>Kaín kjuachaxin chóna Díos mé chóna Cristo; <sup>10</sup>jehe ch'an t'etuehen ch'an kaín kjuachaxin síin nkaya nkajní la ko chjasintajni. Méxra jahara mé chontara kaín kjuachaxin kuèté Díos kixin ó tinkachónkira Cristo. <sup>11</sup>Kjæxin ti ó kjuankíxinra tinkachónkira Cristo, la jehe ch'an kjuíntakára ch'an ijnko xroye, kjánchó ti xroye la jehya itja chojni kuénxín tíha. Náhí. Kjuakjiiin ch'an ti ijie k'uékóxríhanra, mé tíha mé ti xroye tjáhara ch'an. <sup>12</sup>\*Jahara ti ó kuíkítera la éxi xravákoara Cristo. Ndá kjæxin xechónkoara ch'an kixin kuitekáonra ti kjuachaxin kuèté ti Díos kjuínchexechón Cristo. <sup>13</sup>\*Jahara ósé la éxi tsík'enra xíkaha kuék'ejora, kixin ti ijie k'uéchontara la ko ti chontahyara xroye kuèté ti sin judío. Andá ijie la ó xechónkoara Cristo kixin kjuíin ti ijie k'uéchontara. <sup>14</sup>\*Méxra Díos la k'lóxika kaín ti nkehe tsík'itoan ósé kjuachahya chojni kjuínchenchexiteyá, la ko kjuatsen ch'an kaín ti ijie k'uéchóntani kixin Cristo kjuák'enkání ti ntacruz. <sup>15</sup>Mé Cristo k'uénxin ti ntacruz ndá xíkaha kuakitsjehe ch'an ti Jínahña kaín ti kjuachaxin k'uéchóna, la kjuínchekósuêhe

ch'an ti Jínahña k'uíkon kaín chojni, la xíkaha kjuakoxin ch'an kixin jehe ch'an chóna ch'an ti kjuachaxin ti kjuák'enkání ch'an ti ntacruz.

**Tjéyára ti nkehe síin  
nkaya nkajní**

<sup>16</sup>\*Méxra ninkexró chrók'uántaxiánhñara kixin ti nkehe chrókjontera o ti nkehe chrók'uira o ti chrókjuíkosáyehéra ti ñao kia o ti nitjó nixin o ti ñao tok'éhe chojni. <sup>17</sup>Kaín ti nkehe a la éxi ijnko its'uan tóyóhó ti nkehe itsi. Andá ti nkehe chaxín la Cristo tíha. <sup>18</sup>Méxra chrókuítóehyara chrókjuít'ayahara ti sin ndáchro kixin imá jína sin la ko tjikosáyehé sin ti sin ángel. Ti sin a mé chrónkaxín sin nkehe noehña sin, la nchenkexín sin ti nkehe tjenkayáxin sin kuèté chjasintajni ó. <sup>19</sup>\*Andá jehe sin la chaxínhña tinkáchónki sin Cristo, ti ikja ti nínko. Cristo mé t'ayakohen ti nínko la ko nchek'ánkí ti kjuaxrexinkaon kuèté ti chojni tinkáchónki ti jehe ch'an éxi tjinkaon Díos xíkaha.

<sup>20</sup>Andá jahara la ó k'uénkoara Cristo la ó kuítóhéra ti nkehe tjenkayáxin chojni ó. ¿Andá nkekuèté naxa tjejora éxi ti chojni síin chjasintajni, chrókjuínchexiteyára ti nkehe t'etoan sin? <sup>21</sup>T'etoan sin kixin

jahara chrókuákóxiñhñara tíha, la chrókjontehyara nkojín nkehe la ko chrótséxiñhñara nkehe.

<sup>22</sup>Kaín ti nkehe t'etóan sin mé nixja kuèté ti nkehe tsjeje, la tíha mé ijnko nkehe tjenkayáxin chojni ó. <sup>23</sup>Ti nkehe tinkáchónki ti sin a la t'ikon chojni éxi ijnko nkehe chaxín kixin nchenkehya sin la ko nchekjasóte sin cuerpo kuèté sin, kjánchó chónkó tinkáchónki sin xíkaha, kixin tíha chóntahya kjuachaxin tsjinkítsa tsítóhe sin ti nkehe jínahña tjenkayáxin sin.

**3** <sup>1</sup>\*Jahara la ó tsíxechónkóara Cristo. Méxra chrókujuéyára ti nkehe síin nkaya nkajní kixin Cristo la ntiha tjetjaxín ch'an ti itja chjina kuèté Díos. <sup>2</sup>Chrokuénkayáxinra ti nkehe síin nkaya nkajní. Chrokujuéyáhyara ti nkehe síin chjasintajni, <sup>3</sup>kixin jahara la ó k'uénkoara Cristo, andá ijie naxa kónoxínhña ti kjuachón nkochrín tsochontara ti ó ts'ejokóara Cristo la ko Díos. <sup>4</sup>Cristo mé chontaxínra kjuachón nkochrín, la ti ó tsokjan ch'an ndá jahara kjaxinra ts'ejokóara ch'an, ndá ts'ikonra ti kjuachaxin ijie kuèté ch'an.

**Ti ntja ntaxin la ko ti ntja nixin**

<sup>5</sup>Méxra chrókujuéyára kaín ti ijie chjasintajni tjenkayáxinra. Ninkexró chrókuuasinkohya

ijie chojnichjin jehya ichjién, la ninkexró chrókujuich'e nkehe jínahña, ninkexró chrókujuich'e ninkehó ti nkehe tjenkayáxin asén sin, la ko kjaxin chrócoxrianhñara chróchontara nchónhña nkehe, kixin ti xíkaha la ó yóhe chrókuinkachónkira ti nkehe tsíkjanoña. <sup>6</sup>La tsonínkaon Díos la sinchekjasóte ti sin ich'e kaín tíha. <sup>7</sup>Mé xíkaha k'uékjich'era jahara ósé. <sup>8</sup>Méxra ijie chrókujuéyára kaín ti nkehe jínahña, chrókujuéyára ti kjuanínkaon, la ti nkehe tjaké asánra, ti nkehe jínahña, ti t'ándaxíhíra kichuara la ko ti nkehe jínahña t'axrjéxin ir'uara. <sup>9</sup>\*Chrokujuich'iyehyara kichuara kixin ósé xíkaha k'uékjich'era, andá ijie la ó chrókujuéyára kaín ti nkehe ntaxin k'uékjich'era. <sup>10</sup>\*Méxra ijie la ó tsík'ónara chojni nixin. Díos tinkánchetjóá ti jahara kixin ts'ónara éxi jehé ch'an kixin kjuich'éna ch'an ti jahara; méxra tjinkaon ch'an chróchoxínra ch'an antsí jína. <sup>11</sup>Jehya tjetóan á chojni judío o chojni griego, á chojni tsíka xroye o náhí, á chojni tsíkjixín ikjín o náhí, á chojni nohe o chojni noehña, á chojni ch'exón ixra o chojni t'etóan. Ti nkehe tjetóan la kixin tsinkáchónkini Cristo kixin jehé ch'an t'etuehen ch'an kaín nkehe.

<sup>12</sup>\*Díos la tjehe ti jahara la tsíkjuéyára kixin tsinkachónkira

ch'an. Andá jahara la ó k'ónara  
chojni nixin, la chrókuikonoéhéra  
kichuara, la jína chrók'uejora,  
chrókjuinchenkehýara,  
la chrókójiahyara la ko  
chrókónínkákonhñara.

<sup>13</sup> \*Chrokoninkakuénhñara  
kichuara la chrók'uitjáñahanra  
ichrén ijie kjuásihanra íjnko  
chojni kixin Cristo la k'óxika  
ti ijie kjuásinra, la kjaxinra  
xikaha chrókjuich'era. <sup>14</sup> Mé  
xikaha antsí tjeotan kixin  
chrótjuehéra kichuara la nkoqo  
chrókjuénkayáxinra, la xikaha  
nkoqo ts'ejóqo kichuara.

<sup>15</sup> Ti kjuaxróxin tjajon Cristo  
mé chrók'uetuehen asánra  
kixin xikaha kjuénkayáxin  
Díos k'ueyahára ch'an kixin  
chrók'ónara nkoqo cuerpo la  
xikaha chrókjuíkosáyehéra ti jehe  
ch'an.

<sup>16</sup> \*Ti itan kuènté Cristo  
nkochrín chrók'uetuehen  
asánra. Mé xikaha  
chrókjuákohéra kichuara kaín  
kjuaxrexinkaon jína. Chrotsjera  
salmo la ko himno la ko canto  
kuènté Díos, la chróchehéra Díos  
kjuasáya kaín asánra. <sup>17</sup> Kaín ixra  
chrókjuich'eni la ko kaín nkehe  
chróndáchroni, la kaín tíha  
chrókjuanchaxíni kjuachaxíen  
ihñé Ínchéni Jesús, la ko  
chróchehéni kjuasáya It'eni Díos  
kixin tinkáchónkini Jesucristo.

### Ti sin tinkáchónki Cristo la nkojína chrók'uejóko kícho

<sup>18</sup> \*Jahara chojnichjin chónta xii,  
la chrókjuinchexiteyéhéra ti xiara  
kixin xikaha chrókjuákoxinra  
kixin tinkáchónkia Ínchéni.

<sup>19</sup> \*Jahara chojnindoa, la  
chrótjuehéra ti ichjiánra  
la chrókónínkakuénhñara  
tjan. <sup>20</sup> \*Chájan,  
chrókjuinchexiteyéhéra  
it'ára la ko inára kaín ti  
nkehe chrók'uetuotan sin kixin  
xikaha tóxríhñ Ínchéni.

<sup>21</sup> \*Jahara it'é xjan, chjiñéhña  
chrókjuinchekónínkáonra xjaanra  
la ko chrókjuinchek'aváhyara  
xjan. <sup>22</sup> \*Jahara chojni ch'exón  
ixra, chrókjuinchexiteyéhéra ti  
lamoara chjasintajni. Jehya kixin  
ti tjejótsjehe sin ó chrókjuich'era  
ixra éxi ijnko nkexro tjinkaon  
chrókjuinchechéhe chojni ó.  
Náhí. Kaín asánra chrókjuich'era  
ixra kixin tjikosayehéra Díos.

<sup>23</sup> Kaín ixra tjejoch'era la  
chrókjuich'era kaín asánra éxi  
nchexiteyéhéra Ínchéni, la jehya  
kixin chrókjuinchexiteyéhéra  
chojni ó. <sup>24</sup> Kixin ó nohara kixin  
Ínchéni la sintakitonhanra  
ti nkehe chónta ch'an kixin  
ch'ehéra Cristo ixra la jehe ch'an  
mé chaxín Ínchéni. <sup>25</sup> \*Andá ti sin  
ich'e ti nkehe jínahña la tsjacha  
sin ti nkehe jínahña kjuich'e sin

3:13: Ef. 4:32. 3:16: Ef. 5:19, 20. 3:18: Ef. 5:22; 1Pe. 3:1.

3:19: Ef. 5:25; 1Pe. 3:7. 3:20: Ef. 6:1. 3:21: Ef. 6:4. 3:22: Ef. 6:5-8.

3:25: Dt. 10:17; Ef. 6:9.

kixin Díos la sincheejasóte kaín ti chojni chóna ije.

**4** <sup>1</sup>\*Jahara lamo, chrókójnara la ko nkojína chrókuétuehénra ti sin t'ahara ixra. Chroxaxinkáonra kixin kjaxinra chontara ijnko lamo mé Ìnchéni itjen nkaya nkajní.

<sup>2</sup>Chrokuítóehyara nixjehéra Díos la ko nkochrínín chróchjehéra ch'an kjuasáya.

<sup>3</sup>Kjaxin tjanchehéra Díos tsjinkítsa ti jeheni kixin tsjajon Ìnchéni kjuachaxin tsochronkaxíni ti nkehe kuènté Cristo k'uénoehña chojni. Ti ixra i mé tjéchinaxián.

<sup>4</sup>Tjanchehéra Díos kixin tsjajon ch'an kjuachaxin kixin jína chrókuàkua éxi tóxríhín Ìnchéni.

<sup>5</sup>\*Andá jahara la jína chrókuákoxinra ti tjejó ti sin naxa tinkáchónkihya Ìnchéni, la chrókuinchek'itjáñahñara ti tiempo, kixin kjaxin jehe sin chrókuíhín sin ti itan jína.

<sup>6</sup>Nkochrínín chróchontara kjuasàya ti ó nixjehéra sin kixin chrókóxríhín sin tsihin sin, la chrókónohara jína nkexrín chrókuátéhéra ti nkehe tjanchankí nkojnko chojni.

### Kjuixin nixja Pablo

<sup>7</sup>\*Kíchóni Tíquico, mé ijnko nkexro jína choxián la tjinkítsa

ti janhan la ko ch'ehe Ìnchéni ixra, mé tsjiji tsochronka nkexrín itjén janhan. <sup>8</sup>Méxra kuétuahan ch'an tsjiji ch'an ti tjejora kixin tsonohara kixin nkexrín tjejóni kixin xíkaha sinchechéhe ch'an ti jahara. <sup>9</sup>\*Kjaxin tsochr'an ch'in Onésimo, ijnko kíchóni tjehehni, la jína ch'ehe ch'an ixra Ìnchéni, la kjaxin ch'an ijnko ti sin chjasánra. Jehe sin tsjijitsjehe sin ti jahara la ko tsochronka sin kaín ti nkehe sítóhen ti tjejóni ntihi.

<sup>10</sup>\*Ch'in Aristarco, mé nkoqoa k'uejóchinakian ndoehjiso, mé nixjahára ch'an, la ko kjaxin ch'in Marcos, ti nkexro naxa kjéhya ch'in Bernabé. Ó kjoni senó kixin ti chrókuájitsjehe ti ch'in Marcos ti jahara la chrókuájonra kjuachaxin jína tsjak'e ch'an ntiha. <sup>11</sup>Kjaxin nixjahára ch'in Jesús, kjaxin it'in Justo. Andá jehó ti sin a, mé sin judío tinkáchónki Ìnchéni tjinkítsa ti ixra tjet'a, la chrónkaxín sin kuènté ti kjuachaxin kuènté Díos. La ti sin a mé imá kjuínchechàna sin. <sup>12</sup>\*Ch'in Epafra nixjahára; jehe ch'an ch'ehe ch'an ixra Cristo la jehe ch'an mé ijnko chojni chjasánra. Nkochrínín chrónoéhe ch'an Díos kixin tjinkaon ch'an kixin ndoá chrók'uejora,

4:1: Ef. 6:9. 4:5: Ef. 5:16. 4:7: Hch. 20:4; 2Ti. 4:12. 4:7: Ef. 6:21, 22.

4:9: Flm. 1:10-12.

4:10 a: Hch. 19:29; 27:2; Flm. 1:24; b: Hch. 12:12, 25; 13:13; 15:37-39.

4:12: Col. 1:7; Flm. 1:23.

chrókjuinchexiteyára éxi  
tjinkaon Díos. <sup>13</sup>Janhan mé  
k'uíkoxin ikuān kixin ch'in  
Epafras la imá tóxakohen ch'an  
kixin ti jahara la ko ti sin  
tjejó ti chjasin Laodicea la ko  
Hierápolis. <sup>14</sup>\*Ch'in Lucas, ti  
nkexro ch'éna xroān, tjuāha,  
la kjāxin nixjahára ch'an la ko  
kjāxin ch'in Demas.

<sup>15</sup>Nixjehéra ti sin kíchóni  
tjejó chjasin Laodicea, la kjāxin  
nixjehéra tjan Ninfas la ko ti  
sin tónkotsé ndqe tjan. <sup>16</sup>Ti ó

tsjixin sinchekuáxinra ti xroon i  
la ichr'anra sátsji sinchekuáxin  
ti sin tjejó nínko itjen Laodicea,  
la ko kjāxin jína sinchekuáxinra  
ti xroon chr'ahan sin ti ó tsjiji  
ti tjejora. <sup>17</sup>\*Kjāxin tétuehénra  
ch'in Arquipo kixin jína  
chrókjuinchexiteyá ch'an ti ixra  
tsíkajon Ìnchéni sich'e ch'an.

<sup>18</sup>Janhan Pablo tjaná  
kjīnxian tíhi la nixjahára.  
Chroxraxinkáonra kixin janhan  
la tjéchjina. Díos sintañaora  
kaínra. Ótjen.